

Da poi fo balotà le voxe, fato do dil Conseio di X in luogo di do intradi savii dil Conseio, et rimaseno sier Nicolò Mocenigo e sier Piero Trun tutti do stati dil Conseio di X.

Item, governorator di l'intrade sier Bertuzi Zivran fo proveditor a le Biave qu. sier Piero, et Zudexe di procuratori sier Mareo Zen è di la Zonta qu. sier Francesco; et balotà 3 altre voxe ma per l'ora tarda do voxe non fo balotade zoè Oficial alla camera de imprestidi et Sora consolo, si sarano balotadi o non, per le leze non dieno esser ma in tal caso ho visto meter parte di balotar le voxe un' altro conseio et prender, et *etiam* senza altra parte terminar di balotarle e fo balotate. Quel sarà scriverò.

È da saper. Sier Tomà Michiel censor per esser zorno ferial vene a Conseio in paonazo, et per li avogadori, atento i consieri e altri erano vestiti di scarlato li voleva tuor la pena, el qual andò a tuor la sua vesta di scarlato e se la messe che fu cosa assà notanda.

Da poi Conseio li consieri con il Serenissimo e cai di XL fono col Collegio ad lezer le *lettere venute di Udene, et di Franza di l'orator nostro di 15 Septembrio da Ambosa.*

2 *Sumario di la relatione fatta in Collegio per sier Alexandro Contarini venuto capitano di Candia a dì 2 Ottobre 1532.*

Come bisognava far far in Candia altri cinque volti a l'Arseual si che siano volti numero 10 da poter tenir 10 galle al coperto et armarle secondo il bisogno, e tuor la casa dove habita uno di consieri et darla a l'Arsenal dove si potria logar artellarie, le qual stanno al discoperto, albori, antene etc.

Item, ha ricordà si tagli tutte le gratie e concession fate per li rectori di Candia da anni 25 in qua, però che sia alivelato lochi e botege di la Signoria con pagar una minima quantità zoè lire $\frac{1}{2}$ di zera a l'anno, et facendo la camera creseria de intrada da ducati 400 a l'anno in zerca, *etiam* tal livelli si potria vender a raxon di $4\frac{1}{2}$ in 5 per 100 perchè quelli li hanno parte sono danarosi, et si traria da ducati 800 in zerca.

Item, disse si feva per ogni rezimento la monstra zeneral di feudati al che il capitano era ubligato di farla far, la qual è più presto di vergogna che altro per esser quelli malissimo in ordine di cavalli, et remetendo di farla si potria da loro

trar ducati 4000 a l'anno et quelli non volesse pagar li danari fosseno ubligati tenir le cavalcature bone e suficiente et apresentarle di mexi 4 in mexi 4, ma il forzo pageriano li danari.

Item, disse si tien in Candia uno governador di le fantarie con ducati 40 al mexe, 10 caporali con ducati 10, altri 10 con ducati 5, altri 10 con ducati 3 e vien mandati per dissiplinar quelli popoli a l'ordinanza, li quali non fanno ni è per far frutto alcuno e per oppinion sua saria ben mantener do contestabili per l'ordinario in Candia come si fa a Corfù con archibusieri 80 per uno e questi fariano il medemo, et ogni setimana di questi 160 fanti si potria meter fanti 40 in castello dil Muolo fabricato che'l sia, il qual castello sarà di summa importantia, e li danari a pagarli si traria di le contribution di le cavalarie; il resto di fanti fino numero 160 si potrà meter a la varda di la piazza et di le porte, però che al presente sono in Candia 8 contestabili con 15 fanti per uno a le porte et a la piazza deputadi, li quali hanno mezo ducato al mexe e sono famegii di Caloieri e Sartori per il picol salario hannò; e in questa spexa di contestabili, caporali e fanti si spende ducati 900 a l'anno, et mandando li archibusieri cessaria questa spexa. Quanto a fortificar le città sono in l'ixola bisogna assà danari, poi è distante assà l'una di l'altra che non si pol cussì presto socorer, ben l'anderia si facesse uno castello sopra il scoio che è in bocha dil porto over golfo di la Suda et uno altro ne la boca dil pel di la Cania; questi non monteria tanto quanto il castello sopra il muolo di Candia che si fabrica perchè sono lochi facili a fabricar, et a quel di la Suda la mità pageriano quelli di Retimo e l'altra mità quelli di la Cania: et aricorda compito sarà il castello dil muolo si mandi uno castelan con custodia perchè *de fazili* potria esser robato o per via di le bombardiere o per qualche altro muodo, perchè sempre li in porto di Candia sono navilli turcheschi, spagnoli e di altre nation. È chi predisse ditto castelan prenderia la città di Candia.

A dì 2, la matina. Vene in Collegio sier Alexandro Contarini stato capitano in Candia per danari, vestito di veludo alto baso paonazo, con molti parenti et referite iusta il solito.

Vene l'orator cesareo al qual cri li fo mandato a dir per il Serenissimo la revocation di la nova de Cil, reingratiò molto et parlò di cose particular.

(1) La carta 2^a è bianca.